

Carlo Roberto Maria Redaelli

“...ANCJE JO US MANDI VÔ”

(Vanzeli di Zuan 20,21)

Letare Pastorâl 2018-2019

UN COMPIT DISMENTEÂT

1. La glesie e nas da la Pasche di Crist. Lu savîn, ma forsit dopo doi mil agns si sin, o cuasi, dismenteâts. O vin spes ridot la Pasche setemanâl, la domenie, prime a un adempiment strac e repetitîf di un precet festîf e po a un lunc week-end laic. In tantis glesiis si à trasformât il lûc decisîf da la nassite cristiane, il batisteri, intun dipuesit di cjadreis e di scovis o intun altarin indulà meti une statue da la Madone. La celebrazion dai sacraments da la iniziacion cristiane e je diventade cul timp a lâ une ocasion par une fieste di famee destinade a esaurîsi intune zornade sence lassâ o cuasi olme te vite dai zovenuts. La vite da lis comunitâts – comunitâts simpri plui ridotis tal numar e invecjadis – si è scompartide spes intune sfilze di riunions, di cunvignis, di ricorencis tradizionâls che si ripetin simpri plui a la strache vie ogni an. Lis fiestis dai patrons al somee che si sedin dismenteadis dal sant – cualchi volte no je nancje une Messe o un tridui di preparazion – e a son diventadis une ocasion par sagris gjoldosis lungjis plui dîs. A son simpri di plui lis personis che a vivin indiferentis viers la Glesie: o podaressin dî “par principi”, ricambiadis purtrop di ancjetante se no indiferece al minim incapacitât di relazion cun lôr de bande da lis comunitâts cristianis. A aumentin lis fameis (aromai spes di cubiis conviventis) che no batiin plui i fîs ancje se a provegnin di fameis catolichis e talianis e no lu fasin motivant la sielte, come che si usave agns indaûr, cun chê di lassâ che il fi al decidi in libertât quant che al sarà grant se diventâ cristian, ma parcè che

Un quadri
desolant...

la robe semplicementri no interesse. Spes, però, lis comunitâts nancje no san cuale ch'è sedi la percentuâl da lis domandis dai batisims dai fruts rispjet al numar dai nassûts tal teritori parochiâl e si contentin di acetâ dome lis domandis di batisim che a vegnin ancjemò di cualchi gjenitôr (tantis voltis cul sburt dai nonos...). La presince di forescj, in tancj câs (ma no simpri) partignints a altris religjons, e je in aument: si discut cun vivôr, ancje dentri da la comunitât cristiane, sul acet o no acet e problemis relatîfs, ma che Jesù Crist al sedi muart e resurît ancje par lôr al somee che no i interessa a nissun. La presince di cristians impegnâts tai lûcs da la vite comune – lavôr, economie, scuele, universitât, comunicazions, aministrazion, politiche, e v.i. – e je percepibile e autorevule simpri di mancul. L'impegn missionari viers i lûcs evangjelizâts di pôc si è ridot di man in man a une racuelte di solts par sostignî iniziativis di solidarietât. E po il lâ al mancul, diventât un dât inesorabil, da la presince storiche di congregazions religjosis, di convents, di cjasis di cure e di scuelis catolichis. E i seminaris e i nuviziâts vueits, ce desolazion!

2. Esagjerât e pessimist? Ciert. Il quadri reâl da la Glesie ancje ca di noaltris nol è po cussì neri. A son ancjemò tantis personis che a crodin in Jesù, che a prein, che a scoltin la Peraule, che a cirin di vivi il Vanzeli ancje in situazions dificilis. A son tancj predi, diacuns, religjôs e religjosis, oms e feminis da lis parochiis che si impegnin sence sparagnâsi te liturgjie, te catechesi, te caritât. A esistin parochiis e agregazions parochiâls vivis, atentis, ospitâls... E

**Un pessimisim
esagjerât...**

si podarès continuâ a dilunc...

E pûr... e pûr cun onestât o dovìn ricognossi che il fûc da la mission nol è plui cussì vîf dentri di ogni-dun di noaltris e tes nestrîs comunitâts. No je dome colpe nestre. O sin part di une societât, taliane e europeane, ch'è à tacât a lâ di rive jù cun inviement prime di dut demografic, economic e sociopolitic, ma ancje culturâl, dai valôrs e religjôs. Però al è in cheste maniere e in cheste epoche di crisi o, se o volìn viodile in mût positîf, di transizion, che il Signôr nus domande di vivi daûr dal Vanzeli. E nus int domandarà cont. Ma tal stes moment nus int da la gracie.

LA VISITE PASTORÂL

3. O scrîf chestis riflessions, un pôc simplificadis ma o speri comprensibilis e condivisibilis, intant che o soi daûr a pensâ a la visite pastorâl. Si trate di un dai impegns principâi dal vescul e come tâl o vuei vivile. No à però plui sens une visite come che si faseve pal passât tal contest di une societât dal dut, e no dome in part, cristiane. Il vescul al jere une autoritât e come tâl al lave acolt cun ducj i onôrs ancje de bande dai rapresentants da la societât civîl, cun celebrazions straordenariis particulârs e impegnativis in glesie, ma ancje tai diviers lûcs da la vite comune. Al jere difondût ancje un ciert timôr pal voli ispetîf dal vescul e dai siei colaboradôrs. Ciert nol mancjave il contat personâl cu la int, ma intun clime di rispiet riverent viers da la autoritât.

Une modalitât di cheste fate vuê no si pues proponile plui. La visite no pues che vê come destinatarie la comunitât cristiane tes sôs componentis e ativitâts e riferîsi a la sô vite cotidiane. Altris realtâts, par esempi i ambients di lavôr, a puedin jessi visitadis dal vescul cun discrezion e se e esist disponibilitât: lui nol à plui nissune autoritât, almancul di considerazion, intai confronts di lôr.

4. O pensavi di prin intro di fâ une visite pastorâl plui o mancûl di cheste ultime fate cuntune presince semplice e disponibile tal mont lavoratîf da lis nestris parochiis, vierte al incuintri cu lis diviersis realtâts e soledut cu lis personis. Par viodi, cognossi miôr, ringraciâ, incoragjâ, esortâ.

**La visite pastorâl
tal passât**

**La visite pastorâl
e l'anunzi**

Mi soi però domandât: ma chest isal avonde? Il compit dal vescul, sucessôr dai apuestui, no varessial di jessi prime di dut chel dal anunzi? Anunziâ Jesù muart e resurît come il Salvadôr di ducj. Anunziâ l'amôr infinît dal Pari par ogni om e ogni femine. Anunziâ il don dal Spirt che nus divinize convertint i nestrîs cûrs. Cemût fâ par che la visite pastorâl e sedi in sintonie cul impegn che pape Francesc al à fidât a la Glesie di vuê cu la esortazion apostolice *Evangelii gaudium*? Lis primis peraulis di chel document a son une vore claris: «*La gaudie dal Vanzeli e incolme il cûr e la vite interie di chei che si incuintrin cun Jesù. Chei che si lassin salvâ di Lui a son liberâts dal pecjât, dal aviliment, dal vœit interiôr, dal isolament. Cun Jesù Crist e nas e e torne a nassi la gaudie simpri. In cheste Esortazion o vœi fevelâ ai fedêi cristians, par invidâju a une gnove fase evangjelizadore marcade di cheste gaudie e mostrâ stradis pal percors da la Glesie vie pai agns che a vignaran*». Dome se la visite pastorâl e varà contribuît a inmaneâ te nestre Diocesi "une gnove fase evangjelizadore", e varà intivât il so obietîf.

5. Lant indevant cu la riflession e cul confront cui miei colaboradôrs direts e cui diviers organisims di partecipazion e je vignude fûr ancjemò une altre considerazion: dome il vescul aial l'incaric di anunziâ il Vanzeli? O no isal il compit ancje dai predîs, dai diacuns, dai consacrâts e di ducj chei altris fedêi? Parcè che la Glesie e je par sô nature missionarie: e nas da la mission e e vîf par cheste. Dute la Glesie, ogni cristian al è clamât a anunziâ, vivi e

**L'anunzi dal
Vanzeli compit
di dute la Glesie**

testemoneâ il Vanzeli e no dome il vescul. Cemût fâ alore par che la visite pastorâl e sedi une occasion missionarie ch'è coinvolzedi lis comunitâts e i singui cristians e e fasedi diventâ la nestre Glesie plui dinamiche, plui vierte al soffli dal Spirt, plui industrieuse?

O cirarai plui indevant di dâ cualchi indicazion su la maniere di vivi intun mût gnûf la visite pastorâl ch'è cjapi dentri sicu missionariis lis diviersis comunitâts. Sence spietâsi, naturâl, nissun miracul e sence cjariâ la visite pastorâl di cuissà qualis sperancis... parcè che po ce che al rint vive la Glesie e al prudele la sô mission al è la realtât di ogni dì, la strade plene di fede, sperance e caritât che si disglagne di par di inte semplicitât di une vite religjose nudride da la Peraule e dai Sacraments.

Ma isal just no spietâsi nissun miracul? O no isal forsi necessari preâ cun umiltât e fede par che la visite pastorâl e sedi produtive daûr da la volontât di Diu?

6. Ve alore une preiere semplice, che ur domandi a lis comunitâts e a lis singulis personis di jevâ al Signôr ogni dì fin che e dure la visite pastorâl:

Signôr Jesù, tu, Resurît, tu âs mandât i tiei dissepui tal mont, rindintju partecips da la mission che tu vevis ricevût dal Pari. Une mission di amôr, di vite, di salvece. Une mission instradade e animade dal Spirt, ch'è puarte a la pâs e a la remission dai pecjâts. Ancjemò vuê tu fidis a la tô Glesie il com-pit di anunziâ, vivi e testemoneâ il Vanzeli par che ogni om e ogni femine che al nâs su la tiere si sinti amât come fi e fie.

**Une preiere par
la visite pastorâl**

Concêt a la nestre Glesie, ch'è vîf cul vescul il timp da la visite pastorâl, di vê cûr fuart, di metisi di gnûf in strade, di vê fede te azion dal Spirt. Che al sedi un timp di preiere, di scolte da la Peraule, di testimoneance, di incuintri. Un timp dulà scuvierzi cun gaudie e cun maravee la tô azion tal cûr di ognidun, parcè che tu nus precedis simpri come nestri Pastôr. E che, come ai apuestui, nus sedi dade la pussibilitât di tornâ ca di te par condividi con te la tô gaudie parcè che il Pari si palese ai piçui e ai puars. Amen.

LA PERAULE DI DIU

7. Ma cu la preiere, prime di ogni nestri agjî, al è fundamentâl che insiemi si metìn in scolte da la Peraule dal Signôr, par cognossi il mandât dal Resurât, acetâlu cun plasê e baticûr e vivilu cu la guide dal Spirt.

**In scolte
da la Peraule**

In chescj ultins agns o vin cirût insiemi di dâ simpri plui spazi a la Peraule di Diu tes nestris comunitâts, par altri continuant une strade scomençade di un pieç. O ricuardi, parcè che al è impuartant no pierdi memorie da la strade fate, lis diviersis letaris pastorâls: *"Cui che e je la Glesie"*, ch'è proponeve di interpretâ la vite da lis nestris comunitâts tacant da la Glesie dai Ats dai apuestui; *"Une Glesie ch'è scolte e ch'è da acet"*, ch'è continuave la riflession su la Glesie; *"Cui che al è il cristian"*, ch'è proponeve la leture integrâl dal Vanzeli di Luche par capî cui che al è Jesù e di consequence cui che al è il cristian (e cemût no ricuardâ cun ricognossince il sucessîf impegn dai insegnants di religjon da la Diocesi tal proponi dut il Vanzeli di Mateu comentât?); *"Letare al cristian da la domenie"* (publicade ancje tal fassicul intitulât *"Te zornade dal Signôr"*, che al conten la *"Letare ai operadôrs pastorâi: «insumiâsi» la domenie"*), ch'è rivocave la bielece e la impuartance dal jessi cristians ancje sence vê nissun specific impegn te comunitât; e par ultin, l'an passât, *"Il zovin ch'al lave daûr di Jesù. Letare di Sant Marc a une Glesie adulte"*, basade su la esperience dal vanzelist Marc su la fonde dal Gnûf Testament.

Mi jemple di grande gaudie viodi che la proclama-

zion da la Peraule di Diu te liturgjie e ven curade simpri miôr tes nestris comunitâts, constatâ ch'è je daûr a diventâ une dibisugne cuasi naturâl tacâ cualsisedi riunion cuntun moment di *lectio* condividue, viodi che in chescj agns a son nassûts di bessôi Grups da la Peraule (che si son zontâts a chei za in vite) e savê che par tancj fedêi al esist spazi ogni dì par un riferiment a la Peraule di Diu.

8. Ciert, e je ancjemò tante strade di fâ no dome tal insaldâ e slargjâ dutis chestis diviersis esperiençis, ma ancje tal cressi sot doi aspiets là che o sin ancjemò une vore scjars.

Il prin al è chel dal discerniment a partî da la Peraule di Diu. Discerniment di ce? Da la volontât di Diu, di ce che nus domande il Signôr a nivel personâl e comunitari. Un discerniment che al partìs prime di dut dal interpretâ e giudicâ su la fonde da la Peraule di Diu noaltris stes, la Glesie, la societât là che o sin inserîts, la storie che di chê o sin part. Un discerniment che al puarte po a sieltis e a un agjî concret consequent.

No si trate di une operazion mecaniche, ch'è utilize la Scritture come se fos un manuâl o un ricetari par ogni evenience. Nol è nancje alc che al interesse dome la inteligjence di cui che al cîr di capî e po la volontât di cui che al decît di agjî in reson di chel. Dute la persone e ven, dabon, cjapade dentri tal discerniment tacant da la Peraule, ancje tes sôs emozions, tal so sintî, tal so sperimentâ, tal so cro-di, sperâ e amâ. Savint che cui che al agjîs tal cûr dal fedêl che al lei e al scolte la Peraule, destinade a iluminâ la sô vite e chê da la sô comunitât, al è

**La Peraule pal
discerniment
tal Spirt**

prin di dut il Spirt Sant.

Al podarès jessi un pas indevant tal procès di maturitât pai Grups da la Peraule che a esistin za e par chei che, al è di augurâsi, si formaràn tai mêś a vignî, imparâ chest model di discerniment e no limitâ il lavôr dal grup al cognossi in maniere esegjetiche la Scritture, a fâ un confront comunitari sul pas sielt (che a voltis al pues riscjâ di restâ dome, o cuasi, suntun plan emotîf...), a inviâ un percors di preiere.

9. Un secont aspjet che nus met in dificultât al è propi il riferiment a la Peraule pal anuzi missionari, o sei l'anuzi tai confronts dai cussì clamâts lontans: cui che nol à mai vût une educazion a la fede cristiane (che al sedi stât o no batiât nol impuarte), cui che le à pierdude par strade cul timp a lâ. Cemût anuziâ il Ream? Cemût anuziâ la salvece, l'amôr di Diu? No si pues dome ripeti peraulis dal Vanzeli o formulis "kerygmatichis" (o sei frasis che a contegnin in mût sintetic la fede cristiane). Al covente cjatâ la maniere di intivâ tal dialic lis domandis, lis sperancis, ce che a cirin lis personis. Ma scomençant da la Peraule, savint ch'è à une sô fuarce, une sô capacitât di conversion.

**La Peraule
pal anuzi**

10. La esperience di cierts grups e moviments ben preparâts in chest e ch'è no mancual preziose di cui che in chescj agns, cun tant impegn e dedizion (e ancje cun tant amôr...), al sta acompagnant i cresimants adults a tornâ su la strade da la fede, a puedin insegnâ tant a lis nestris comunitâts. Pensant in particulâr a la visite pastorâl come oca-

**Un sussidi
pal anuzi**

sion di anunzi, o soi daûr a meti adun un test che, cun riferiment a cualchi toc dal Vanzeli, al presenti cun sinteticitât in forme di dialic la fede cristiane. Si intitolarà: *Si puedial?*... O volarès che al fos doprât te visite pastorâl (come che o spiegarai plui indevant), ma ancje intes visitis a lis fameis, tai incuintris cui gjenitôrs da la catechesi, cui cresimants adults, cun cui che si prepare al matrimoni... Mi plasarès po che al fos tignût a puartade di man (te borse o borsete...) dai cristians plui sensibii, pront par jessi consegnât co al nassès par câs (ma al è simpri in ogni robe un disen providenziâl...) un dialic su la fede cuntun amì, un coleghe o ancje un compagn di viaç ocasionâl.

11. O ai plasê però proponi za in cheste letare un esercizi di scolte e di discerniment riferît a la Peraule, tignint ad a ments la caraterizazion missionarie da la visite pastorâl. Il pas che o intindarès someti a la nestre riflession al è chel che i à dât il titul a cheste letare, titul che al costituìs ancje la massime da la visite pastorâl. Si trate dal cjap. 20 dal Vanzeli di Zuan, i versets 19-23: il Resurît presint framieç dai dissepui.

**Il mandât dal
Resurît tal
Vanzeli di Zuan**

TAL CENACUL LA SERE DI PASCHE

12. «Sore sere d'in chê di, la prime da la setemane, intant che a jerin sieradis lis puartis dal lûc là che a jerin i dissepui par timôr dai Judeus, al rivà Jesù, si fermà framieç di lôr e ur disè: "Pâs a vô!". Dit chest, ur mostrà lis mans e il flanc. E i dissepui a gjolderin tal viodi il Signôr. Jesù ur disè di gnûf: "Pâs a vô! Come che il pari mi à mandât me, ancje jo us mandi vô". Dit chest al soflà sore di lôr e ur disè: "Cjapait il Spirt Sant. A chei che ur perdonârês i pecjâts, ur saran perdonâts; a chei che no ur ai perdonârês, ur restaran no perdonâts"» (Zuan 20, 19-23).

**Dal Vanzeli
secont Zuan
20,19-23**

13. Ju incuintris dal Resurît cui dissepui presints tai cuatri Vanzelis e al inizi dai Ats dai apuestui a àn simpri une conotazion missionarie, di mandâ. Un mandâ in mission che al è aromai diferent rispjet a chel dai dodis e i setantedoi dissepui intant da la vite pubbliche di Jesù. Alore la lôr mission e jere une preparazion e un sprolungjament da la azion di Jesù («Al clamà dongje i dodis e ur de autoritât e podê di parâ fûr ducj i demonis e di vuarî lis malatiis. E ju mandà a anunziâ il ream di Diu e a vuarî i malâts»: Luche 9, 1-2; «Dopo di chescj fats il Signôr al sielzè altris setantedoi dissepui e ju mandà doi par doi devant di se in ogni citât e lûc che al stave par visitâ»: Luche 10, 1) e e veve come orizont chel limitât di Israêl («No stait lâ intune strade di pagans e no stait jentrâ intune citât di samaritans; lait a cirî pitost lis pioris dispierdudis da la cjase di Israêl» Mateu 10, 5-6). Cu-

**Il mandât
missionari
che il Resurît al
fide a la Glesie**

mò, te Pasche, la mission si vierç a dut il mont e e devente proprie da la Glesie, ma in continuazion da la mission che Jesù al à ricevût dal Pari. Chest al è un aspjet metût in lûs so redut dal Vanzeli di Zuan, in coerence cun dute la sô storie là che al ven metût in evidence di un continui il rapuart tra Jesù e il Pari.

Par chest si fermìn cumò dome su ce che al à presentât Zuan a rivuart da la mission dopo Pasche tal cjap. 20. Al pues jessi però interessant – e lu propon ai conseis pastorâi – aprofondî tai moments di *lectio* ancje i altris pas che a presentin il compit missionari che il Resurît al fide a la Glesie. Ju trascrîf come un invît a une lôr riprese.

Mateu 28, 16-20: «I undis dissepui, intant, a Ierin in Galilee, su la mont che Jesù ur veve dit. Co lu vioderin, lu adorarin. Però a vevin ancjemò dubis. Alore Jesù si fase dongje e ur disè: "A me mi è stât dât ogni podê in cîl e su la tiere. Lait duncje e inscuclait ducj i popui, batiantju tal non dal Pari e dal Fi e dal Spirt Sant, insegnantjur a meti in pratiche dut ce che jo us ai ordenât. E ve, jo o soi cun vô ducj i dîs, fin a la fin dal mont"».

Marc 16, 14-19: «Par ultin ur comparì ancje ai Undis, intant che a jerin a taule, e ur cridà par la lôr malfidence e durece di cûr, parcè che no ur vevin crodût a chei che lu vevin viodût resurît. E ur disè: "Lait par dut il mont e predicjait il Vanzeli a ogni creature. Cui che al crodarà e si fasarà batiâ al sarà salvât, cui che nol crodarà al sarà condanât. Chescj a saran i segnâi che a acompagnaràn chei

che a crodin: tal gno non a pararan vie i demonis, a fevelaran lenghis gnovis, a cjaparan in man sarpints e, se a bevaran cualchi velen, no ur fasarà mâl; a metaran lis mans sore dai malâts e chei a vuarissaran". Il Signôr Jesù, dopo di vê fevelât cun lôr, al fo puartât sù in cîl e si sentà a la diestre dal Signôr. Alore lôr a lerin a predicjâ dapardut, biel che il Signôr al operave insiemi cun lôr e al confermave la Peraule cui miracui che le acompagnavin».

Luche 24, 44-49: «Po al disè: "A son chestis lis peraulis che jo us disei cuant che o jeri ancjemò cun vô: bisugne che si compissin dutis lis robis scritis sul gno cont te leç di Mosè, tai Profetis e tai Salms". Alore ur vierzè la ment par capî lis Scrituris e al zontà: "Cussì al è scrit: il Crist al patissarà e al risussitarà dai muarts la tierce dì; tal so non si predicjarà a ducj i popui la conversion e il pardon dal pecjâts, scomençant di Gjerusalem. Di chest vô o sês testimonis. E ve, jo o mandi su di vô chel che il Pari gno al à prometût; ma vô restait in citât fintant che no sedis riviastûts di une fuarce ch'è ven di adalt"».

Ats 1, 3-8: «Dopo la sô passion, lui si palesà a lôr vîf, cun cetantis provis, par cuarante dîs, comparintjur e fevelant dal ream di Diu. Biel che al mangjave cun lôr, ur ordenà di no slontanâsi di Gjerusalem, ma di spietâ l'adempiment da la promesse dal Pari, "chê – dissal – che o vês sintût da la mê bocje: Zuan al batià cun aghe, vô invezi o sarês batiâts in Spirt Sant di ca a pôcs dîs". Chei duncje

che a jerin cun lui i domandavin: "Signôr, isal chest il timp che tu tornarâs a meti in pîts il ream par Israël?". Ma lui al rispuindè: "No us spiete a vô di cognossi timps o moments che il Pari si à riservât par se, ma o cjaparê la fuarce dal Spirt Sant che al vignarà jù su di vô e di me o sarê testimoni a Gjerusalem, in dute la Judee e la Samarie e fin ai confins dal mont"».

14. Tal episodi contât di Zuan Jesù e i dissepui si dan dongje la "prime dì da la setemane". Al tornarà te istesse dì ancje vot zornadis dopo, tal episodi che al rivuardarà Tomâs. La indicazion temporâl no je par câs, ma e palese la impuartance za par la prime comunitât cristiane da la otave dì, la dì dopo la sabide, dì dal Resurît, dì da la Glesie, dì dal "crevâ il pan". Lu confermin i Ats («*La prime dì da la setemane si jerin dâts dongje par crevâ il pan*»: Ats 20,7); lis letaris di Pauli, che lu lein ancje a la caritât («*Ogni prime dì da la setemane ognidun di voaltris che al meti in bande ce che al à rivât a sparagnâ*»: 1 Corinz 16,2) e l'Apocalìs («*Jo, Zuan, vuestri fradi e compagn te tribulazion, tal ream e te perseverance in Jesù, mi cjatavi te isule clamade Patmos par colpe da la peraule di Diu e da la testemoneance che i vevi fate a Jesù. O foi cjapât dal Spirt te zornade dal Signôr*»: Apocalìs 1, 9-10). A son indicazioni preziosis che nus sugjerissin di tornâ a dâi valôr a la domenie come zornade dal Signôr: la zornade da la comunitât, da la Eucaristie, da la caritât, ma ancje da la mission. Une mission ch'è devente prin pas tai dîs di vore par vivi di cristians la testemoneance dal Vanzeli dilunc du-

**La prime dì
da la setemane**

te la setemane. Par valorizâ e vivi miôr la domenies nestris parochiis e tes unitâts pastorâls, al sarès impuartant, ancje in ocasion da la visite pastorâl che si concludarà in ogni unitât pastorâl (o parochie) cu la celebrazion di une "domenie comunitarie", recuperâ lis indicazions proferidis da la letare pastorâl dal 2016-2017: *Te zornade dal Signôr*. Inte seconde part, intitulade: "*Insumiâsi la domenie*", si à cirût in efjets di descrivi une domenie ideâl, ma no par chest "idealizade" e impussibile. Cheste, almancul in cualchi element, e je za in part vivude in diviersis nestris comunitâts, ma e je ancjemò tante strade di fâ par che la zornade dal Signôr e sedi simpri plui centrâl ancje tes gnovis unitâts pastorâls.

15. I dissepui, che li di lôr al ven Jesù, no son ciert in fieste. Il vanzelist al note che lis puartis a son sieradis par timôr dai Judeus (il tiermin grêc al è "fobie"). Intant che Jesù al è jessût dal sepulcri, lôr a son sierâts come intune tombe. No je bastade la testimoniance di Marie la Madalene (cf 20,18), ni dal dissepul che al jere rivât par prin al sepulcri e che al à viodût e crodût (cf 20,8).

Cuâl isal il motîf di chest timôr? Il pericol di jessi perseguitâts come Jesù? Tal Vanzeli di Zuan si fevele altris voltis di pôre e e je relative al ricognossiment public di Jesù. Cussì tal cjapitul 7 riferide a chê part da la int di Gjerusalem che pûr lu ricognosseve come "bon": «*Nissun però nol fevelave di lui in public, par pôre dai Judeus*» (7,13); tal episodi dai gjenitôrs dal nassût vuarp: «*Chest a diserin i siei gjenitôrs, parcè che a vevin pôre dai Judeus; in*

Un contest di timôr

efiets i Judeus a vevin za stabilît che, se cualchidun lu ves ricognossût come il Crist, che al vignès parât fûr da la sinagoghe» (9,22); tal cjapitul 12 cun riferiment ai socestants: «In ogni câs, ancje tra i socestants, tancj a croderin in lui, ma, a cause dai fariseus, no lu declaravin, par no jessi parâts fûr da la sinagoghe» (12,42); par ultin tal cjapitul 19 dulà che si fevele dal compartament fin alore tignût di Josef di Arimatee: «Dopo di chescj fats Josef di Arimatee, che al jere dissepul di Jesù, ma in segret, par timôr dai Judeus, al domandà a Pilât di podê tirâ vie il cuarp di Jesù. Pilât i disè di sì» (19,38).

La pôre di jessi ricognossûts come crodints, di jessi segnâts cul dêt come personis che a van in glesie, che a frecuentin la parochie. Une pôre ch'è bloche, ch'è lasse l'amâr in bocje, ch'è fâs sintî un pôc vilias e e fâs ancje stâ mâl. Tu sês in gjite turistiche cui amîs par plui dîs, e rive la domenie, e sarès la pussibilitât di lâ in glesie e tu fasis fente di nuie... E pûr e sarès une ocasion preziose par testimonear il Signôr. Cuant che si supere la pôre e si si espon, si à a voltis la bieles sorprese che la testimonear e funzione: il bon esempi, dât cun semplicitât e umiltât, al rive in cualchi câs a disblocâ il timôr di altris che pûr a volaressin manifestâsi come cristians ma no olsin. E si scvierç cussì di no jessi di bessôi a volê vivi cun coerenca di cristians.

16. In chel contest di timôr e di dinei, Jesù al ven. I dissepui no lu cirin come ch'è à fat Marie e nancje Pieri e chel altri dissepul che a son corûts ch'è matine al sepolcri. Ma Jesù al ven istès. Lu veve pro-

**Jesù al ven
e al done la pâs**

metût tai discors da la ultime cene: «*No us lassarai vuarfins, o tornarai ca di vô*» (14, 18); «*O vês sintût che us ai dit: o voi e o tornarai ca di vô*» (14,28). No si lasse blocâ ni da lis puartis fisichis, ni dai cûrs inclostrâts.

Lis peraulis che al indrece ai dissepui -«*Pâs a vô*»- no son dome il salût ebraic "shalom" e nancje un auguri gjeneric, ma il don da la pâs. Chê pâs che te Biblie e je la plenece e la bielece da la vite. Il Resurît al è il "princip da la pâs" (cf Isaie 9,5; Michee 5,4). Le veve anunziade tai discors di cumiât: «*Us lassi la pâs, us doi la mê pâs, no us e doi come che le da il mont. Che nol sedi conturbât il vuestri cûr e nol vedi timôr*» 14,27). Al è significatîf che chê frase di Jesù e vedi une continuazion te liturgjie eucaristiche dopo il Pari nestri e prime dal don vicendevul da la pâs: la pâs che o podìn proferîsi un cun chel altri e je dome chê di Crist.

La pâs di Jesù no je chê dade dal mont, che invezì e rive al plui a sigurâ dome une temporanie assenche di conflit. Spes po si contrapon ai dissepui e ur puarte tribulazions. Simpri tai discors da la cene Jesù al veve afermât: «*Us ai dit chest par che o vedis pâs in me. In chest mont o vês ce patî, ma fasêtsi fuarts: jo o ai vinçût il mont!*» (16,33).

La pâs e je un element essenziâl dal anunzi missiunari parcè ch'è ven incuintri a une situazion dut fûr che pacifiche. Al è prin di dut conflit e conturbie dentri di noaltris. No si trate dome di une cuistion psicologjiche, ma di un disasi, une infelicitât radicâl, un malstâ cun noaltris stes. Sant Ignazi di Loyola, grant mestri spirituâl, al viôt te pâs dal cûr di cui che si incjamine tes stradis dal Vanzeli il segnâl

da la presince dal Spirt dal Signôr e, al contrari, te conturbie la azion dal spirt cjatîf: «*In chei che si impegnin a purificâsi dai lôr pecjâts e che a van indevant simpri miôr tal servizi di Diu nestri Signôr [...] al è propri dal spirt cjatîf tormentâ, avilî, meti in dificoltât e conturbâ cun resons falsis, par impedî di lâ indevant; invezî al è propri dal spirt bon dâ olse e energjie, consolazions e lagrimis, ispirazions e serenitât, fasint lâ al mancûl e gjavant vie ogni dificoltât, par lâ indevant te vie dal ben*» (Esercizis spirituâi, n. 315). Judâ lis personis a incuintrâ il Signôr, a resisti al mâl e a cjaminâ su lis stradis dal Vanzeli al pues puartâ in lôr tante pâs (lu san ben i confessôrs, che a voltis a assistin cun maravee e ricognossince al cambiament profont dal cûr da lis personis in gracie dal perdon e da la pâs vûts tal sacrament).

Ma la pâs e je un don prezîôs ancje par lis fameis, par la societât, pai popui. O pensi in particolâr a la nestre societât, là che "si è gjavât il tapon" a lis emozions plui viamentis e sconvenientis, si è pierdût il rispiet dovût a lis personis e a lis istituzions, si son disdoganadis reazions imediadis e violentis (par colpe ancje di campagnis mediatichis, cun cualchi interès de bande di cualchidun che i fâs comut cjalalgjâ emozions incontroladis e pôris, e al doprâ tant che mai i *social* cussì imediâts te lôr espression). Puartâ in non di Crist e ancje da la dignitât umane pâs, rispiet, atenzion, scolte, dialic, e v.i. al pues jessi un impegn prezîôs pai cristians di vuê.

17. Jesù al mostre ai dissepui lis mans (feridis) e

**Ricognossi
il crucifis**

il pet (trapassât). Il Resurît al è il Crucifis. Chest nol significhe dome ch'è je continuitât te stesse persone, ma che la crôs e je part ad in plen dal misteri da la Pasche e no je scancelade o superade da la resurezion. Il Resurît al reste par simpri segnât da lis plaiis da la passion. Te Trinitât il Fi di Diu al è l'om Jesù crucifis e resurît. Prime ancjemò che i teolics, lu àn ben capît i artiscj, che a àn spes rapresentât la Trinitât cun tal mieç il Crucifis (al baste ricuardâ l'afresc dal Cuatricent di Masaccio te glesie di Sante Marie Novele a Florence). No si à po di dismenteâ che, te storie da la passion secont Zuan, dal pet al jere vignût fûr sanc e aghe (cf 19,34), realizant cussì la profezie dal flum di aghe vive destinât a salvâ e bagnâ la tiere (cf Ezechiel 47,1); Zacarie 14,8).

18. I dissepui a ricognossin subit il Signôr (diferent dal toc compagn di Luche 24, 41-47). Lu viodin e chest al realize la promesse di Jesù tal discors da la ultime cene: «*Ancjemò par pôc e il mont no mi viodarà plui; ma vô mi viodarês parcè che jo o vîf e vô o vivarês*» (14, 19). Simpri in chê sere Jesù al veve prometût ancje la gaudie, ch'è nas dal viodilu e dal jessi viodûts di lui: «*In veretât, in veretât us dîs: vô o vaiarês e o zemarês intant che il mont al gjoldarà. Vô o sarês avilîts, ma il vuestri aviliment si tramudarà in gaudie [...]. Us viodarai di gnûf e il vuestri cûr si indalegrarà e nissun nol rivarà a puartâus vie la vuestre gaudie*» (16, 20-22). Une gaudie ch'è deventarà plene cuant che i dissepui a varan otignût ce che a domandaran al Pari tal non di Jesù: «*In veretât, in veretât us dîs: ce che vô o*

**La gaudie
tal viodi il Signôr**

domandarês al Pari a non gno, us al darà. Fin cumò no vês domandât nuie a non gno. Domandait e o otignarês, par che la vuestre gaudie e sedi plene» (16, 23-24). Une gaudie ch'è restarà ancje quant che Jesù nol sarà plui visibil, secont la preiere che lui al à indreçât al Pari: «Cumò jo o ven ca di te e chestis robis ur es dîs biel che o soi tal mont, par che a vedin in lôr stes la mê gaudie in dute la sô plenece» (17, 13).

19. Dopo di vê rinovât il don da la pâs, Jesù al mande i dissepui in mission. Tal Vanzeli di Zuan fin a chest pont si podevin cjatâ dome in pâr di peraulis su la mission: tal episodi da la samaritane («*Jo us ai mandât a seselâ ce che no us à causât fadie; altris a àn fadiât e vô o vês cjapât il lôr puest te fadie*»: 4,38) e, in maniere indirete, te ultime cene («*In veretât, in veretât us dîs: il servidôr nol è plui grant dal so paron ni un invidât nol è plui grant di cui che lu à mandât*»: 13,16; «*In veretât, in veretât us dîs: cui che al acetechel che jo o mandarai, mi acete me; cui che mi acete me, al acetechel che mi à mandât*»: 13,20). Plui clâr il pas da la preiere di Jesù tal cjap. 17 che al anticipa chel che al fasarà di Resurît: «*Come che tu mi âs mandât me tal mont, cussì ancje jo ju ai mandâts lôr tal mont*» (17,18).

Zuan al risierve il mandât a chest moment: al è il Resurît che al mande in mission i dissepui in continuitât cu la mission vude dal Pari.

20. Cui sono i dissepui mandâts in mission? Dome i apuestui? In chest câs la peraule di Jesù sedi su la

**Come che il Pari
mi à mandât me,
cussì ancje jo
us mandî vô**

**I dissepui:
ducj i crodints**

mission sedi, pôc oltri, a rivuart dal perdon, e sarès indreçade dome ai apuestui e ai lôr sucessôrs, i ministris da la Glesie. Il vanzelist al cognòs la distinzion tra i Dodis e i dissepui (a la fin dal discors te sinagoghe di Cafarnao al scrîf: «*Di chel moment tancj dai siei dissepui si tirarin indaûr e no lavin plui cun lui. Alore Jesù ur disè ai Dodis "Volêso lâ vie ancje vô?"*»: 6, 66-67) e ca nol dopre il tiermin "Dodis" o ("Undis"), ma "dissepui". Duncje il mandât di Jesù al rivuarde ducj i crodints in Crist (tal pas simil di Luche 24, 36-53, il Resurît al comparì ai Undis e chei ai altris che a jerin cun lôr: cf 24, 33, ancje a lis feminis: cf Ats 1, 14).

21. Tal vanzeli di Zuan Jesù si definìs simpri in raport cul Pari, come l'inviât mandât dal Pari a compî la sô volontât, ch'è je di vite, di salvece: «*Dabon Diu i à volût tant di chel ben al mont che al à dât so Fi, l'unigjenit, par che cualsisei che al crôt in lui nol ledi pierdût, ma al vedi la vite eterne. Diu, in efîets, nol à mandât il Fi tal mont par condanâ il mont, ma par che il mont al sedi salvât midiant di lui. Cui che al crôt in lui nol ven condanât; ma cui che nol crôt al è za condanât, parcè che nol à crodût tal non dal Fi unigjenit di Diu*» (3,16-18; cf ancje 6,38-40). Jesù al agjìs come il Pari e al fâs chel che al fâs il Pari (cf 5,17; 5,19; 10,37-38). Tra il Fi e il Pari al è un scambi continui di amôr (cf 3,35; 5,20). Ancje l'insegnament di Jesù al è chel dal Pari: «*La mê doctrine no je mê, ma di chel che mi à mandât*» (7,16; cf ancje 12,49-50). Par chest cui che al viôt Jesù, al viôt il Pari e cui che al crôt in Jesù, il Fi, al crôt tal Pari: «*Cui che al crôt in me,*

**Jesù,
l'inviât dal Pari**

nol crôt in me ma in chel che mi à mandât; cui che mi viôt me, al viôt chel che mi à mandât» (12,44-45: cf ancje la rispueste dade a Filip te ultime cene: 14,8-11).

22. Cumò il Resurît al mande i dissepui tal mont. Ju mande in continuitât cu la sô mission: Il "*come che... cussì...*" nol va intindût cuasi che si tratàs dome di une comparazion tra azions similis (il Pari mi à mandât; jo us mandi), ma al palese il fat che si trate da la stesse mission. Ancje i dissepui a dovaran anunziâ al mont l'amôr dal Pari, la sô volontât di salvece e no di condane.

La continuitât tra Jesù e i dissepui (il «*come che il Pari...*» paralêl al «*cussì ancje jo...*» no rivuarde dome il jessi mandâts in mission e il contignût da la stesse: Jesù al clame i dissepui a vivi, traviers di lui e cul don dal Spirt, il so stes rapuart cul Pari. Il «*come che... cussì*» al devente alore prin di dut un trasmeti ai dissepui lis stessis peraulis che Jesù al à ricevût dal Pari: «*Cumò lôr a san che dutis lis robes che tu mi âs dât a vegnin di te, parcè che lis peraulis che tu mi âs dât jo ur es ai dadis a lôr. Lôr lis àn acetadis e a san pardabon che o soi vignût fûr di te e a àn credût che propi tu mi âs mandât» (17, 7-8). Al devente un rindiju partecips dal stes amôr dal Pari: «*jo ur ai fat cognossi il to non e o continuerai a fâural cognossi, parcè che l'amôr che tu âs vût par me al sedi in lôr e jo in lôr» (17, 26). Al devente in maniere radicâl fâ partecips i dissepui da la vite trinitarie stesse, dal stes rapuart che Jesù al à cul Pari: «*Se un mi vûl ben, al metarà in pratiche la mê peraule e il Pari gno i volarà ben e o***

**La mission
e la Trinitât**

vignarìn ca di lui e o larìn a stâ ca di lui» (14,22).

23. No pues jessi alore une mission da la Glesie, e duncje di ogni cristian, ridote a une cuistion organizative o a un mandât esterni di puartâ insom: la mission si inlidrise te vite da la Trinitât. E à origjin dal Pari, si materialize tal Fi, par opare dal Spirt. E si cumplîs te Trinitât. Il fin ultin da la mission, ve, nol è trasmeti ideis, convinzioms, contignûts di crodi, ma fâ in maniere che cui che al scolte e acete l'anunzi al podedi jentrâ ancje lui te comunion cul Pari, il Fi, il Spirt Sant. Lu aferme Jesù te preiere da la ultime cene. Dopo di vê anticipât il mandâ che al fasarà di Resurît («*Come che tu mi âs mandât me tal mont, cussì ancje jo ju ai mandâts lôr tal mont*»: (17,18), Jesù al pree il Pari pai destinatari da la mission dai dissepui: «*No prei dome par chescj, ma ancje par chei che a crodaran in me in gracie da la lôr peraule: par che ducj a sedin un; come tu, Pari, in me e jo in te, che a sedin ancje lôr in nô, par che il mont al cognossi che propi tu mi âs mandât*» 17,20-21). Fin da la mission dai dissepui al è partant che ducj a sedin in Diu: la comunion plene è sarà dome al compiment, ma za cumò traviers la Peraule, i sacraments, la vite di caritât ducj i crodints a partecipin da la vite stesse di Diu. Il don plui grant che la Glesie e pues fâ ancje ai oms e feminis di vuê al è disvelâur che a son stâts creâts par jessi no dome imagjin e someance di Diu, ma fis e fiis, amâts, perdonâts, salvâts. E dâur la pussibilitât di vivi la comunion cul Pari e cul Fi tal Spirt.

Il fin da la mission al è inserîsi te vite da la Trinitât

24. Al è clâr che il dissepul al pues puartâ insom cheste mission dome se al è in comunion cul Pari par mieç dal Fi tal Spirt. Se si distachisi da la vît, alore si devente une vidice secje par se e pai altris (cf 15,4-5). Se si piert il contat cul Signôr, se no si nudrissisi simpri cu la sô Peraule, cui Sacraments, se no si reste vierts a la azion dal Spirt, si puedin trasmeti dome nozions, no di sigûr une vite. Ma il Vanzeli isal par noaltris une cuistion di vite o al è une robe tra lis tantis? Si puedin inventâ dutis lis miôr e plui futuristichis formis di catechesi pai fruts, i fantats, i zovins e ancje i adults; si pues al contrari – e je une ilusion – tentâ di riproponi formis dal passât, ma il risultât nol cambie, se a scomençâ dai gjenitôrs, dai catechiscj, dai animadôrs nol è dentri dal cûr la convinzion che il messaç dal Vanzeli al è une cuistion di vite. Al pues jessi missionari dome cui che al è crodint, ciert cun ducj i siei peccjâts, lis sôs fragjilitâts, lis sôs contradizions, parfin cui siei dubis..., ma come un che al à scuviert il tesaur da la vite e al vûl dividilûl cui altris.

**Il Vanzeli:
une cuistion
di vite**

25. Jesù al fâs un gjest particolâr viers i dissepui: al sofle. Il verp "soflâ" al capite dome ca in dut il Gnûf Testament, ma al è presint plui voltis tes pagjinis dal Antîc Testament. La azion di Jesù e rivoche il sofli dal Creatôr che al da vite a Adam (cf Gjenesi 2,7). Ma si pues pensâ ancje al sofli dal Spirt che ur da di gnûf vite ai cadavars te vision dal profete Ezechiel (cf Ezechiel 37,9).

Cumò il Resurît cul so sofli ur da ai dissepui il Spirt di vite, che ju consacre e ju abilite a la mission. Al è pardabon un colegament tra consacrazion e mi-

**Al soflà
su di lôr**

ssion. Jesù lu veve metût in clâr te sô preiere al Pari: «*Fasiju sants te veretât. La tô peraule e je veretât. Come che tu tu mi âs mandât me tal mont, ancje jo ju ai mandâts lôr tal mont; par lôr jo mi fâs sant me par che ancje lôr a sedin fats sants te veretât*» (17,17-19).

26. Tai discors da la ultime cene tal Vanzeli di Zuan Jesù al fevele plui voltis dal Spirt, dal Consoladôr come don pai dissepui. Il Spirt ur insegnarà dut e ur fasarà vignî iniment dut ce che ur veve dit (cf 14,26), completant cussì l'insegnament di Jesù (cf 16,12-15). Il Spirt al sostignarà la testimoniance dai dissepui: «*Cuant che al vignarà il Consoladôr, che jo us mandarai dal Pari, il Spirt da la veretât, che al procêt dal Pari, lui mi fasarà di testimoni; e ancje vô dait testimoniance parcè che o sês cun me fin dal principi*» (15,26-27).

Ma ancje in altris bandis dal Vanzeli di Zuan si fevele dal Spirt: il Spirt che al ven jù sore di Jesù tal batisim (e Jesù al batiarà tal Spirt: cf 1,32-34); il Spirt che al permet di tornâ a nassi di adalt, come che Jesù al dîs a Nicodem (cf 3,4-8); Il Spirt che al è dât "sence culumie" di Lui, inviât dal Pari (cf 3,34); il Spirt che al permet la vere adorazion dal Pari (cf 4,21-24); il Spirt che al da la vite e lis peraulis di Jesù a son spirt e vite (cf 6,63). E je po une alusion ch'è fâs riferiment al don dal Spirt che al vignarà dât dopo che Jesù al sarà glorificât e che al deventarà «*flums di aghe vive*»: «*Chest al disè dal Spirt che a varessin ricevût chei che a crodevin in lui: cun di fat nol jere ancjemò il Spirt, parcè che Jesù nol jere ancjemò stât glorificât*» (7,39).

Il don dal Spirt

Cumò, apont, Jesù glorificât ur done il Spirt ai dissepui: tal Vanzeli di Zuan lis Pentecostis e coincidin cu la Pasche.

27. Colegât cul don dal Spirt al è il podê dât ai dissepui a rivuart dai pecjâts. Te Glesie da lis origjinis il colegament tra Spirt Sant e remission dai pecjâts al è ricuardât plui voltis: cussì, par esempi, il dì di Pentecostis de bande di Pieri (*«E Pieri ur disè: Convertîtsi e ognidun di vô che si fasi batiâ tal non di Jesù Crist, par la remission dai vuestris pecjâts, e o ricevarês il don dal Spirt Sant»*: Ats 2,38).

**Il pardon
e la denuncie
dal pecjât**

Il podê dât ai dissepui, a la Glesie (no interesse ca cemût che si lu met in vore) al è prime di dut chel di perdonâ, di proferî la misericordie di Diu. Ma al è ancje chel di denunciâ il pecjât parcè che si vedi la conversion. Ancje il Spirt, su la fonde di ce che al à dit Jesù te ultime cene, al à un compit di mostrâ il mâl: *«E cuant che al sarà vignût, al dimostrerà la colpe dal mont a rivuart dal pecjât, da la justizie e dal judizi»* (16,8).

Jesù al vûl il pardon, al è stât mandât dal Pari no par condanâ, ma par salvâ (cf 3,17). A Lui, però, i spietarà il judizi definitîf (cf 5,22.26-30). E za te sô vite publiche Jesù si opon al pecjât: al denuncie la indisponibilitât al dialic e a la colaborazion di cui che si opon a la lûs (cf 3,19-21); al vise il paraltic vuarît che al somee che no vedi acetât il don che i è stât dât (*«Ve: tu sês vuarît! No pecjâ plui, par no che ti capiti alc di piês»*: 5,14); al disvele il pecjât dai judeus che lu contrastin (cf 8, 23-24); al constata la insensibilitât dai fariseus: *«Se o fossis*

vuarps, no varessis nissun pecjât; ma dal moment che o disês: "Noaltris o viodìn", il vuestri pecjât al reste» (9,41).

28. Une mission di vite, chê fidade dal Resurît a la Glesie. Une mission ch'è vûl puartâ a la vite di Diu e che par chest e denuncie il pecjât. Une mission fidade a noaltris vuê, te concretece da lis circos-tancis atuâls. Ma simpri lant daûr da la Peraule e cu la guide dal Spirt Sant. Di invocâ cun fede.

**Une mission
di vite**

LIS UNITÂTS PASTORÂLS

29. Introdusi a chest pont il teme da lis unitâts pastorâls al pues someâ fûr di lûc. A puedin forsi jessi significativis par la visite pastorâl, tal sens che cheste e pues organizâsi in maniere plui razionâl par unitâts pastorâls o ben e pues jessi util par acompagnâ il lôr nassi e insaldâsi. Ma ce jentrino cu la mission, cu la Peraule di Diu, cul discerniment? Par dî il vêr al covente ametût che la impression che la siele di strutturâ la Diocesi in unitâts pastorâls e sedi dome une cuistion organizative leade al câl dai predis e à cualchi fundament. Se si varès vût ancjemò un bon numar di predis, cun dute probabilitât no si si sarès mots dal cuadri tradizionâl di une Diocesi sudividue in 90 parochiis, cualchidune ancje une vore piçule ma dutis cun almancul un predi. Forsi si varès tentât di lavorâ di plui insiemi tra comunitâts parochiâls e, prime ancjemò, tra plevans. Forsi... In concret il câl e l'invecjament dai predis nus à sburtât za di un pieç a rifleti su lis unitâts pastorâls. Tancj components dai conseis pastorâi, in plui dai predis, a ricuardaran che cualchi an indaûr o vin dedicât par un an intîr ju incuintris di inzornament al teme da lis unitâts pastorâls, sedi cun testimoniancis e esperiencis di Diocesis vicinis, sedi cun amplis e interessantis riflessions di caratar teorik sot diviers ponts di viste: teologjic, sociologjic, psicologjic, riflessions che al è just tacâ di gnûf. E cumò al è vignût il moment di siezzi – fin che si è in timp... – di scomençâ a meti-lis in pratiche te plui part da la nestre Glesie. O sin par altri in compagnie cun tantis Diocesis, ancje

**Lis unitâts
pastorâls: bisugne
ocasionâl o disen
providenziâl?**

dongje, che di un timp plui o mancul lunc a àn cjàpât cheste strade cun sistemis e risultâts diferents. Al somee duncje savi "rassegnâsi al inevitabil"... Ma se o scomencìn cjalant i fats secont la fede, o podìn rivâ a capî che a voltis situazions ocasionâls a platin un disen providenziâl: no puedial jessi cussì ancje par lis unitâts pastorâls?

30. Se lis unitâts pastorâls si ridusaressin a la fidance da la responsabilitât pastorâl di plui parochiis a un plevan sôl, sence modificâ nuie altri, il risultât al sarès un cumul di lavôr simpri plui grant su lis spalis di un predi costret a cori cun preocupazion di une parochie in chê altre par garantî dutis lis Messis di orari e un minim di presince in ogni comunitât. La robe no funziona e e pues diventâ dome cause di delusion pal predi e di tension tra e tes comunitâts. Dome se lis parochiis a fossin piculis e une vore dongje si podarès pensâ che la unitât pastorâl cussì concepide e podarès costituî juste un procès par diventâ in prospetive une uniche parochie plui grande, cun plui centris religjôs. Ma ancje lis parochiis cun pôcs fedêi a àn spes une lôr identitât e, a voltis, une lôr vivarosetât significante.

31. Dut al cambie – o almancul – al pues cambiâ se lis unitâts pastorâls no vegnin intindudis come une strutture calade di adalt che cuasi e oblee plui parochiis a fâ riferiment a un sôl predi, cun ducj i disasis relatîfs, ma tant che un procès di inviâ e fâ cressi cul timp a lâ, cun tante pazience e costance, viers un mût diferent di vivi la comunione tal jessi comunitât cristiane, di meti in pratiche la testemo-

**Un model
che nol funziona:
plui parochiis
fidadis a un sôl
plevan**

**La unitât pastorâl
come un "procès"
plui che no une
strutture**

neance evangjeliche e la mission, di concretizâ une ample vocazion al servizi e coresponsabilitât, di jessi segnacul incisîf dal Vanzeli te societât moderne. Intune peraule, di ubidî vuê, tes cundizions che si cjatìn a vivi, al mandât dal Resurît.

La decision di scomençâ une unitât pastorâl, tai ultins tims dal vescul (ma mai cjapade dome di lui) e basade su la concrete disponibilitât dai predis e sul acet (a voltis nancje dîlu fadiôs...) da lis comunitâts coinvoltis, e costituìs dome un inizi. E je plui une promesse, un progjet, un compit fidât a lis comunitâts coinvoltis, che no alc metût in vore une volte par simpri. Alc di acetâ no come une "disgracie" o in ogni câs une dure e inevitabile necessitât, ma come une preziose oportunitât, un gjest di fiducia, une ocasion di cressite in linie cul Vanzeli.

No bisugne maraveâsi che a proposit da lis unitâts pastorâls si vedi di fevelâ plui di "procès" che no di realtât atuade. Si trate, in realtât, di alc di tipic te vite di ognidun, da lis comunitâts e da la Glesie stesse. La vite no je mai statiche, ferme o fin voltade bande il passât, ma e je dinamiche, e je cressite, e je maturazion, e je viertidure al futûr. Nus al à ricuardât pape Francesc che te sô esortazion apostoliche ch'è à viert il so pontificât, la *Evangelii gaudium*, indreçade a invidâ la Glesie interie a cjapâ une determinade svolte evangjeliche e missionarie, al à proponût cuatri principis fondamentâi ancje dal agjê pastorâl. Un di chescj al è chel ca: "*il timp al è superiôr al spazi*" (n. 222). Al vûl dî che al è decisîf par pape Francesc, ancje in ambit eclesiâl e no dome sociâl, "*scomençâ procès plui che no di possedi spazi*" (n. 223), parcè che

ancje l'impegn di evangjelizazion "*al domande di tignî presint l'orizont, di sielzi i procès pussibii e la strade lungje*" (n. 225).

32. Cun chê di inviâ il procès da lis unitâts pastorâls sence la pretese di rivâ ipso facto a la conclusion e a la perfezion, al pues jessi util proferî cualchi element par scomençâ. No un "manuâl" complet su lis unitâts pastorâls, ma un pocj di indicazioni, come chês che a son tal sfueut che si cjate te confezion di un gnûf smartphone o di cualchi altri tramai tecnologjic e clamadis "*Quick Start Guide*", une version curte curte dal "*User Manual*" par che l'utent si abitui al prodot prime pussibil. Dome dopo di vê tacât a fâlu funzionâ, si leiarà tal moment just il manuâl complet par vê rispuestis plui precisis o, plui spes, si domandarà jutori a cualchi amî plui espert o che za di un pieç al dopre chel celulâr o chel strument (par altri: ancje tal câs da lis unitâts pastorâls, come par altris realtâts o iniziativis pastorâls, al è simpri util fâsi judâ da la esperience e dai conseis di cui che za di timp al vîf chê modalitât pastorâl. A esistin te nestre Diocesi diviersis unitâts pastorâls che a funzionin za e ben: a son di sigûr disponibilis a dâ une man a cui che al scomence, ancje dome cul contâ apassionât e inceôs, ma purpûr realistic, la strade fate).

Une "Quick Stars Guide" par lis unitâts pastorâls

33. Un prin pont di ricuardâ a son i trê atôrs o sogjets da la unitât pastorâl: lis comunitâts, i conseis pastorâi, il grup.

In primis lis comunitâts cristianis cjapadis dentri. Par ognidune di lôr nol è facil impensâsi adun cun

I trê atôrs da la unitât pastorâl: lis comunitâts

chês altris. La reazion spontanee e je chê di meti in evidence e difindi la proprie identitât, i propriis mûts di sintî, lis propriis iniziativis plui o mancul tradizionâls e di considerâ chê altre o chês altris comunitâts come estraniis e in concorence. La strade di fâ e je invezî prime di dut chê di cognossisi tra lis personis che a apartegnin a lis diviersis parochiis. Fin che i components di chê altre comunitât a son "chei" e "chês" da la "parochie di san..." e no deventin invezî une muse precise, un non cognossût, une vite cristiane notorie, un impegn di servizi preseât, no si va tant lontan. Dut ce che al pues prudelâ cognossince, scambi, condivision, stime di un cul altri al va privilegjât massime tai prins timps da la nassite di une gnove unitât pastorâl.

No bisugne vê premure tal meti in vore il proposit di coordinâ e sincronizâ lis tantis iniziativis da lis parochiis e dai diviers grups: al covente prime di dut cognossisi e condividi. Par esempi, i catechiscj da lis parochiis jentradis a fâ part da la unitât no dovaressin par prime robe pensâ al probleme da la organizazion e da la unificazion dai diviers percors di catechesi, ma pitost cjatâ la maniere di incuintrâsi in semplicitât e cordialitât, di scambiâ esperiencis e sistemis di lavôr, di condividi plasês e preocupazions, di sintîsi – intune peraule – "ducj te stesse barcje" e ducj apassionâts dal Vanzeli e da la sô transmission a la gjenerazion dai zovins. Ogni iniziative ch'è pues jessi a pro da la cognossince e je duncje di valorizâ e privilegjâ: une fieste ch'è cjapedi dentri i fedêi di dute la unitât pastorâl, un pelegrinaç comun, une gnove iniziative di fâ insiem (magari une ativitât imagjinade o fin insumiade

di un pieç ma mai puartade insom par colpe da lis pocjis risorsis a disposizion di ogni singule comunitât parochiâl e cumò finalmentri fatibil).

I vûl cjatât po il mût di palesâsi vie vie simpri plui come une realtât unitarie, une vere comunitât nudride da la stesse Peraule e da la Comunion. Parcè che ogni forme cjapade da la comunitât eclesiâl, e da la unitât pastorâl, no pues che cjatâ il propri centri e il propri aliment in Crist, par diventâ jê stesse part dal unic Cuarp di Crist ch'è je la Glesie. Il percors viers la unitât al dêf avignî cirint però di valorizâ i dons e i carismis di ogni comunitât, parochiâl e no, a servizi dal insiemi intun itinerari comun. Al è impuartant cjapâ cussience da lis carateristichis e dai talents i ogni parochie (che a voltis fin la parochie interessade no a cussience plene), da lis risorsis materiâls (glesiiis, cjasis canonichis, ricreatoris, salis par incuintris, e v.i.), da lis personis disponibilis, da lis iniziativis in vore. Tacant di ca si podarà cirî dilunc vie di coordinâ al miei il percors da la unitât. Par esempi, al sarà fûr di dubi (gjavant motîfs di nature acidentâl) incuardrâ il pont di riferiment da la ativitât caritative da la unitât te parochie là che al esist za di un pieç un bon centri di scolte e dulà ch'è je presinte, in grazie dal impegn di predis e di fedêi tai agns e parfin tai decenis prime, ancje une estese sensibilitât caritative. Une glesie secondarie metude intun lûc cuiet e intim e podarà invezi lâ ben par ritîrs spirituâi e incuintris di preiere. Un ricreatori ben furnît al podarà diventâ al contrari il pont di riferiment par la pastorâl dai zovins da la unitât interie. E i esempiis a podaressin continuâ.

Ogni comunitât parochiâl e, al sô interni, lis eventuâls comunitâts mai diventadis parochiis o che a jerin parochiis ma che a mantegnin ancjemò une lôr identitât cristiane, e dovarà po cjatâ manieris par vivi moments siei propriis no par isolâsi dal rest da la unitât pastorâl o par rivendicâ autonomie, ma par proferî ai propriis fedêi la esperience di cjatâsi inlidrisâts intune comunitât. Tal câs che, par esempi, nol fos pussibil garantî intune piçule comunitât la celebrazion da la Eucaristie dutis lis domeniiis, al podarà jessi bon che si fedi une celebrazion in dîs di vore a une ore juste par cjatâsi insiemi, preâ par la comunitât, pai defonts, par lis diviersis dibisugnis e po, in plui da la celebrazion, vê moments di incuintri e di vicinances.

Il fat che la Eucaristie e sedi la sorzint da la Glesie nol vûl dî però che ogni plui piçule comunitât e vedi di jessi par fuarce une comunitât eucaristiche, se no za lis parochiis atuâls si spacaressin in tancj grups ognidun cu la sô celebrazion individuâl. Al covente in ogni câs che te unitât pastorâl la Eucaristie e vegni celebrade e celebrade ben, ufrint la pussibilitât di une sô celebrazion significative e fatibil. E nas cussì la necessitât di tornâ a pensâ l'orari da lis celebrazions. Si trate di un impegn di frontâ cun serenitât ancje se a voltis al cause cualchi disasi ai fedêi (parcè che nol è pussibil in ogni câs contentâ ducj...). Bisugne tignî presint cualchi criteri che al dovarès jessi condivisibil cun facilitât, di adatâ a la situazion locâl. Un prin logjic criteri, che al à di guidâ e, prime ancjemò, justificâ lis modificjis di orari, al è chel di evitâ che lis celebrazions, da la domenie e dai dîs di vore, tes parochiis

che a fasin part da la stesse unitât pastorâl a sedin previodudis a la stesse ore. Se al jere cussì prime da la nassite da la unitât pastorâl, bisugne a pene pussibil distribuîlis di gnûf in plui oraris, sedi par permeti ai predis destinâts a la unitât pastorâl, scomençant dal plevan, di jessi a cjâf (no vint il don da la ubicuitât...), sedi par ufrî ai fedêi da la unitât pastorâl, che si puedin movi di une glesie a chê altre, une siele il plui pussibil ample e adate ai lôr ritmis di vite. Un secont criteri, che al nas ancje chest da la necessitât, al è chel di tignî cont dal numar dai predis al servizi da la unitât pastorâl. I vûl fat in mût che, tal câs di assence o di malatie di un di lôr, e sedi facile une sô sostituzion temporanie. Chest al vûl dî che nol è pussibil che al sedi previodût di solit che ducj i predis da la unitât pastorâl a disedin messe dôs voltis tai dîs di vore e trê voltis in chei di fieste. Un tierç criteri al è chel che lis celebrazions no si dedin la volte sence nissun just interval, che al permeti une celebrazion ben curade, dignitose, partecipade di une comunitât significative ancje rispiet al numar, cu la pussibilitât di un incuintri tra il predi e i fedêi prime e dopo la sante Messe. Naturalmentri al podarà jessi util fâ stât su la gjenerositât dai fedêi par favorî il moviment da lis personis anzianis e par facilitâ la partecipazion di ducj (in particolâr cuant che, in cualchi câs, si ten une celebrazion unitarie par dute la unitât). A ogni mût, infûr di situazions di premure, no pensi che te nestre Diocesi, viodudis lis distancis curtis tra une glesie e chê altre e il numar ancjemò sufficient di predis, al coventi sostituî la sante Messe da la domenie cuntune celebrazion da la Perau-

le, cun a cjâf un diacun, un religjôs o une religjose o un fedêl laic.

34. Un secont sogjet o atôr impegnât inte unitât pastorâl a son i conseis pastorâi. Il consei pastorâl al dovarès jessi il "motôr" di ogni parochie: no juste un grup di conseîrs dal plevan (che po al decît e al fâs come che i pâr...) e nancje la sede di decisions dome organizativis. Si trate invezî dal lûc privilegjât dal discerniment pastorâl là che plevan (e predis) e conseîrs insiemi, cun diviersis responsabilitâts, cun pazienze e sensibilitât a la azion dal Spirt, a cirin (e a imparin un pôc a la volte a fâlu simpri miôr) di interpretâ la vite da la comunitât su la fonde da la Peraule, cun riferiment a lis indicazioni dal magjisteri e in cordiâl sintonie cu lis norms diocesanis, tal tentatîf di individuâ, decidi e meti in pratiche chel che al covente a la comunitât tal so percors evangjelic concret. Cuant che dôs o plui parochiis a son unidis in unitât pastorâl, i propri conseis pastorâi a dovaressin no diminuî ma aumentâ il lôr impegn di discerniment, in particolâr par guidâ e acompagnâ lis comunitâts tai passaçs progressîfs di inviament e di maturazion da la unitât pastorâl. Logjic che i conseis a dovaran cjatâ la maniere di coordinâsi tra di lôr e viodi cemût organizâsi in futûr par che si vedi un riferiment unitari e eficient, ma che no si pierdedi tal stes moment la atenzion pastorâl a ogni singule comunitât. Si podarà, par esempi, mantignî conseis separâts e stabilî un organisim unitari, une zonte, formât di dutis lis zontis dai conseis cul compit dal coordinament. O ben si podarà sielzi (magari no di subit...) par un

**I trê atôrs da la
unitât pastorâl:
i conseis pastorâi**

unic consei unitari e istituî par lis problematichis pastorâls locâls commissions formadis dai conseîrs partignints a lis diviersis parochiis.

Compit dal consei unitari o dai conseis coordinâts da la zonte unitarie al sarà in particolâr chel di meti adun un pôc a la volte un progjet pastorâl comun, che al fasi di riferiment e guide pal percors da la unitât pastorâl. Un progjet che al podarà jessi confrontât e condividût man man ancje intune o plui assembleis cun ducj i fedêi da la unitât pastorâl.

A rivuart dai conseis pai afârs economics, necessaris di dirit par ogni ent parochie (cf can.537), al sarà just fâju finî intun consei unitari componût da lis stessis personis, che al fasarà di consei par ogni singole parochie, favorint cussì un percors comun ancje sot il profîl amministratîf e economic (scomençant di un ûs savi e raziônâl dai imobii e da lis risorsis a disposizion).

35. Un tierç sogjet fundamentâl pal progrès da la unitât pastorâl al è costituît dal grup, che al à come president il predi plevan di dutis lis parochiis da la unitât, che il vescul i fide la responsabilitât da la stesse. No dutis lis unitâts pastorâls a podaran vê la presince di un grup, ma dulà che al è pussibil, e je la sielte di privilegjâ. Il grup al è costituît dal plevan e di un o plui predis e, al è di augurâsi, di un o plui diacuns, di religjôs o religjosis e, in prospettive, di un o plui fedêi laics disponibii a condividi l'impegn pastorâl dal insiemi. Compit dal grup al è chel di sigurâ la conduzion pastorâl ordenarie e continuative da la unitât pastorâl, in colegament cu la strade segnade dal consei pastorâl (o dai conseis

**I trê atôrs da la
unitât pastorâl:
il grup**

pastorâi tal lôr insiemi). Intun ciert sens al podarà jessi viodût come un "plevan coletîf): al grup, di fat, i spiete dut ce che al è compit di un plevan intune parochie. Chest al è pussibil se tra i siei components a esistin e si rinfuarcin un pôc a la volte cognossince, stime, fraternitât; se cul timp a lâ si madurîs al so interni une buine sintonie di opinions e di sieltis; se si san articolâ ben compits e responsabilitâts di ognidun. Chest al dêf risultâ in maniere clare ai fedêi da la unitât pastorâl, che a dovaran dicerni simpri in ognidun la stime viers chei altris components dal grup e la unitarietà di azion, pûr devant di diviers incarics davuelts di ognidun dai components. Al covente, duncje, che il grup si dedi un program di incuintris precîs (par esempi cuntune frequence setemanâl) là che al sedi spazi prime di dut par la preiere e la Peraule di Diu e po par la scolte, l'informazion di un cun chel altri e la programazion da lis diviersis ativitâts, e la verifiche. E che il grup al vedi ancje une presince ricognossude cu la unitât pastorâl interie, par esempi cun cualchi moment di incuintri e di celebrazion par dute la unitât pastorâl.

Su lis responsabilitâts dentri dal grup (e da la unitât pastorâl) al è ben ricuardâ che chestis a son diferentis. Prime di dut i spiete al plevan la responsabilitât ultime da lis parochiis da la unitât pastorâl (e a `nd à ancje la rapresentance legâl), ma le dêf meti in vore in comunion cordiâl cui altris components dal grup. Chei altris predis, che a `nd è part, a condividin cul plevan la conduzion complessive da la unitât pastorâl, badant però di persone di un determinât ambit pastorâl come stabilît dal vescul

o concurdât dentri dal grup (par esempi, fasint di riferiment par une da lis parochiis o tignint di cont di une pastorâl specializade: pai zovins, familiâr, caritative, e v.i.). Stes discors al vâl par chei altris components dal grup.

Al è clâr che la unitarietât e la omogjeneitât di lavôr dal grup stes a servizi di dute la unitât pastorâl a puedin jessi garantidis dome se ducj si impegnin intun progressîf percors di conversion, che al domande timp, lealtât, pazienze e disponibilitât. Il plevan al à di cirî di rezi a plen la sô responsabilitât, sfuarçantsi di vivile in maniere colegjâl cul confront, il contribût e il sostegn dai altris, superant ogni forme di isolament e di autoriferiment che nol ten cont dai altris e di altri. Ancje chei altris predis, massime se plevans emerits (e in particolâr se a restin a stâ tal stes lûc che ju à viodûts plevans a titul plen) a son clamâts, cul jutori dal Signôr e intun gjest di fede, a capî che si pues vivi a plen il jessi sacerdots ancje sence vê plui une responsabilitât pastorâl primarie, sostignûts di une fraternitât sacerdotâl plui fuerte e autentiche. Chest al pues permetiur di meti in vore cun plui serenitât e libertât (e timp) ce che al caraterize il ministeri sacerdotâl te sô essence: la vicinace, l'acet e la scolte da lis personis, l'anunzi da la Peraule di Diu, lis celebrazions, la disponibilitât pal sacrament da la confession, la atenzion ai malâts, e v.i. La lôr esperience e la lôr maturitât umane e sacerdotâl a puedin ancje contribuî a creâ un clime seren e costrutîf dentri dal grup e da la unitât pastorâl. Ancje i diacons a puedin cjatâ te esperience dal grup la ocasion par dâ un respîr pastorâl plui ampli al lôr mi-

nisteri, che al vadi di là da la funzion esercitade tes celebracions liturgjichis. I religjôs e lis religjosis, po, a puedin esprimi di plui il lôr carisme dal pont di viste pastorâl e di servizi a la Glesie locâl. Infin i laics che a dovessin jessi part dal grup a varessin la pussibilitât preziose di vivi une funzion ministeriâl plui significante, di puartade pardabon ample, ch'è vadi di là dal compit dome di catechist, animadôr da la liturgjie, operadôr da la caritas, e v.i.

36. A proposit dal consei pastorâl unitari (o dai conseis pastorâi in ogni câs coordinâts tra di lôr) si à vût dit che il so compit fundamentâl al è chel di rivâ un pôc a la volte a la redazion di un progjet pastorâl par la unitât pastorâl. No si trate tant di impegnâsi a meti jù un test scrit (che a un ciert pont al sarà in ogni câs just rivâ), ma pitost di cjatâ la maniere miôr di impegnâsi par otignî tal concret e cui tims necessaris i obietîfs tipics da la unitât pastorâl se cheste no vûl jessi dome une strutture organizzative. Si trate dai obietîfs che a dovressin caracterizâ ogni realtât pastorâl, ma la unitât pastorâl e pues ufrî a chei un contest particolarmenri zovevul.

La esperience positive di cualchi an indaûr ch'è à viodût coinvoltis tantis parochiis te redazion dai "ats da la comunitât", une sorte di descrizion di se stes e di progjet da la comunitât parochiâl a la lûs da la esperience da la prime Glesie descrite tai Ats dai apuestui, e pues jessi un precedent significatîf par frontâ l'impegn dal progjet pastorâl (anzi, al podarès lâ ben scomençâ a cognossisi tra conseis da lis diviersis parochiis cu la leture dai "ats da la

**Il progjet pastorâl
e i obietîfs da la
unitât pastorâl**

comunitât” di ogni parochie). A son za di un pieç te Diocesi unitâts pastorâls che a àn provât a meti jù un propri progjet pastorâl: chestis a puedin jessi di esempi e di jutori par lis gnovis esperiencis.

37. Un prin obietîf di rivâ al è la cressite te comunion. La comunion e nas da la Peraule, ch’è clame a la fede comune e condividude; e je nudride dai sacraments, in particolâr da la Eucaristie; e je don dal Spirt, di invocâ tes preieris. La comunion si realize tal amôr vicendevul palesât midiant di chês carateristichis une vore concretis che san Pauli al descrîf tal imni a la caritât: «*La caritât e je magnanime, benevule e je la caritât; no je invidiose, no si vante, no si sglonfe di albasie, no mancje di rispiet, no cîr il so tornecont, no si inrabie, no ten cont dal mâl patît, no gjolt da la injustizie, ma si console da la veretât. E perdone dut, e crôt dut, e spere dut, e sopusarte dut*» (1Cor 13,4-7).

La comunion e je decisive par ogni esperience di Glesie: e je decisive però in mût particolâr tal câs da lis unitâts pastorâls. Sence comunion – prime di dut tra lis comunitâts parochiâls coinvolzudis – la unitât pastorâl e je destinade al faliment imediât. Juste apont cheste necessitât “vitâl” da la comunion e pues sburtâ lis unitâts pastorâls a impegnâsi a pro di chest obietîf ancjemò plui che no lis singulis parochiis.

Bisugne alore domandâsi massime de bande dal grup e dal consei pastorâl:

Cemût favorî la comunion inte unitât pastorâl tra e dentri lis diviersis comunitâts parochiâls, i grups, lis svariadis realtâts ecclesiâls? Cemût fâ

**Un prin obietîf:
la comunion**

par che cheste comunion no sedi sierade, ma vierte, ospitâl, inclusive?

Il progjet pastorâl, a proposit di chest prin obietîf, al nas da la rispueste a chestis e similis domandis frontadis in riferiment a la Peraule di Diu e cu la guide dal Spirt.

38. Un secont obietîf da la azion pastorâl al pues someâ mancûl tipic da lis unitâts pastorâls: la mission. Slargjâ però la comunion di là da la proprie comunitât al dovarès sburtâ a jessi in ogni câs plui vierts cui altris e duncje a impegnâsi di plui tal anuzi e te testimoniance. Ancje cun plui eficacie, dovude al meti insiemî risorsis e capacitâts.

La mission e la testimoniance a rivuardin prime di dut ogni cristian. E e pues vê inizi juste cul no scuindi di jessi cristian tai diviers ambients là che si vîf, come za si veve vût dit comentant il mandât dal Resurîf. No si à di fâ biele mostre da la proprie fede: al baste no scuindi a chei di famee, ai propriis coleghis di lavôr, ai propriis amîs, a lis personis che si è in cualchi maniere in relazion, che si va a Messe, si frecuente la parochie, si crôt in cierts valôrs e si cîr di viviju (parcè che no scuindi di jessi cristians e vivi par principi in maniere contrarie al Vanzeli e je la piês testimoniance negative che si puedi dâ...).

Ma la mission e rivuarde po dute la comunitât cristiane e e domande dentri vie (tal concret dentri da la unitât pastorâl) une serie di condotîs e iniziativis. Par esempi: plui acet; plui atenzion ai "gnûfs" e ai "forescj"; la riprese da la visite a lis fameis; une propueste plui missionarie par lis categoriis che la

**Un secont obietîf:
la mission**

comunitât e jentre in contat: gjenitôrs da la catechesi, malâts, puars, e v.i. Ma e covente ancje une azion missionarie cul esterni, ch'è pues fâ stât, tra l'altri, suntune atenzion reâl ai no batiâts, talians e forescj, e suntune significative presince testimonêl tai diviers ambients da la vite sociâl.

Cemût puartâ insom dut chest cun concretece?

Cemût jessi fedêi in vuê al mandât dal Resurît?

Cun cuâi mieçs e risorsis e cun cualis iniziativis?

Cun cualis prioritâts?

A son lis stessis domandis di formulâ par rivâ a un projet da la unitât pastorâl che al sedi pardabon missionari.

39. Plui clare e je la oportunitât ufierte da lis unitâts pastorâls par un tierç obietîf da la azion pastorâl: la cressite dai ministeris, il don dal servizi al Vanzeli, o sei funzions, compits, servizis dentri da la comunitât. Fin dal inizi la Glesie si è articolade in ministeris. No si trate ancje in chest câs di une cuistion organizative leade a un probleme concret. Chest, come ch'è je stade pai siet che da la lôr istituzion al fevele il cjap. 6 dai Ats dai apuestui, al pues jessi dome la ocasion par la nassite di un ministeri che al è don dal Spirt. In chel câs il probleme al jere il servizi a lis mensis e al jere stât metût in lûs cuntune proteste («*In chei dîs, biel che il numar dai dissepui al cresseve, chei di lenghe greghe a malignarin cuintri chei di lenghe ebraiche parcè che, te assistance cuotidiane, a vignivin trascuradis lis lôr veduis*»: Ats 6,1). La soluzion no je stade dome di cjatâ voluntaris cun esperience di mensis aziendâls..., ma di sielzi «*siet*

**Un tierç obietîf:
la cressite da la
vocazion al servizi**

oms di buine reputazion, plens di Spirt e di sapience» (Ats 6,3) bogns di cjapâsi sù un gnûf ministeri.

A la unitât pastorâl, plui ancjemò che no a la single parochie, i coventin ministeris e a sô volte e pues ufrî un contest plui ampli di esercizi dai stes rispiet a chel parochiâl. Chest si à za viodût a proposit dai components dal grup. I vûl metût però in lûs che la unitât pastorâl e je un ambit une vore fecont massime pai ministeris laicâi. Chescj no cjatin il lôr fundament intune funzion di suplence a la mancjance di sacerdots, ma ben tal batisim, che configurant a Crist – re, sacerdot e profete –, al rint i laics sogjets atîfs a plen te comunitât cristiane. Si à duncje di aprofitâ da la nassite e da la cressite da la unitât pastorâl par une promoziun tai diviers ambits da la pastorâl dai ministeris esistents (par es. catechiscj, ministris da la Comunione, animadôrs da la liturgjie, operadôrs da la caritas, ...) e par la nassite di gnûfs (par es. previodint in particolâr tes unitâts pastorâls plui grandis la presince da la gnove figure dai responsabii dai oratoris). Une promoziun e un inviament là che, in grazie ancje da lis pussibilitâts plui grandis dadis da la unitât pastorâl in tiermins di personis e di risorsis, si podarà vê une cure plui grande te individuazion da lis personis disponibilis, te lôr formazion permanent, te lôr organizazion. Ancje di chest al dêf occupâsi il progjet pastorâl, che al dêf vê inizi da la rispueste a domandis come chês ca sot:

Cuâi sono i ministeris che a jerin za presints tes parochiis da la unitât pastorâl? Sono ancjemò utii? Se sî, cemût fâju cressi e rindiju disponibilii

par la unitât pastorâl interie? Esistie la necessitât o ancje dome la oportunitât di fâ nassi gnûfs ministeris? Cemût formâju?

40. Infin lis unitâts pastorâls a puedin e a devin impegnâsi par otignî un ultin obietîf: la cressite da la capacitât di inflûs dal messaç dal Vanzeli te realtât sociâl dal dì di vuê, cun gnovis formis diferentis di chês dal passât aromai esauridis e ancje, co covente, cun cualchi segn di "profezie". Si trate di alc che al somee sproporzionât no dome par la parochie singule, ma ancje par lis unitâts pastorâls. Al è di fat un probleme che al tocje dute la Glesie, in particolâr tal Ocident aromai ex-cristian, e di sigûr la Glesie taliane. Tal piçul, però, si pues fâ alc, almancul in riferiment al ambient che ogni comunitât cristiane e fâs part. In chest sens il fat che la unitât pastorâl, plui che no la parochie singule, e coincidi in dut o in part cuntun contest sociâl plui unitari e omogjeni (par esempi il teritori di un o plui comuns), e pues judâle a cjatâ cualchi modalitât par fâ in maniere che la societât e cressi tai valôrs umans e evangjelicis. Chest al dêf avignî tal rispjet assolût da lis funzions e da lis distinzions tra comunitât eclesiâl e societât civîl e te valorizazion da la autonomie dai cristians laics e da lis lôr formazions eventuâls, ma intun spirt di colaborazion e di servizi al ben comun e a la dignitât da la persone, cussì come insegnât dal Concili e afermât dal Concuardât che al è in vore. Il progjet pastorâl al dovarà ocupâsi ancje di chest, daûr di domandis come chês ca sot:

Cuale ise la situazion sociâl là che la unitât pas-

**Un quart obietîf:
plui inflûs te
societât**

torâl e opere? Cualis sono lis problematichis plui urgjentis a rivuart dal teritori e da la popolazion? Esistino za ambits di colaborazion cu la societât civîl e cu lis istituzions publichis? Cemût potenziâju e valorizâju? Esistino situacions là ch'è je domandade une funzion "profetiche" da la comunitât cristiane?

41. I compits impegnatîfs da lis unitâts pastorâls a puedin jessi frontâts dome cuntune dople guide: la Peraule di Diu e la azion dal Spirt Sant. Dome un riferiment costant a la Peraule di Diu de bande di ogni cristian, da la comunitât, dal grup, dai conseis pastorâi al pues permeti a la unitât pastorâl di no jessi un fat dome organizatîf, plui o mancul acetât, ma la realizazion di une autentiche esperience eclesiâl. In chest sens al è fundamentâl che in ogni unitât pastorâl si aumentedin i Grups da la Peraule, come lûcs no par cristians di élite, ma par crodints che cun semplicitât e disponibilitât a vuelin metisi in scolte da la Peraule di Diu. La Peraule, in efiet, e illumine, e confuarte, e ten sù, ancje e cride e e fâs vê un pôc a la volte il mût di viodi, di sintî, di giudicâ, di agjî di Jesù. La Peraule ispirade dal Spirt e incjarnade dal Spirt stes te concretece da la vite di ogni comunitât.

Un Spirt che la sô azion no si pues progjetâ o decidi su la cjarte, parcè che il Spirt al è aghe vive, al è fûc, al è vint. Lis unitâts pastorâls a podaran nassi e existi cul timp a lâ e jessi une realtât evangjeliche dome se il lôr progjet nol sarà une scjatule sierade, ma une vele alçade al vint dal Spirt.

**La Peraule
e il Spirt**

LA VISITE PASTORÂL

42. A chest pont a risultin ancjemò plui clârs cuâi che a devin jessi i obietîfs da la visite pastorâl, che, come viodût tal inizi (cf nn. 3-6), e dêf vê une carateristiche missionarie. La visite, intindude no come ativitât dome dal vescul ma come ocasion par un percors eclesiâl che al coinvolzedi dutis lis componentis dal popul di Diu te contemporaneitât da la nestre Glesie, e dovarès vê come finalitât: acompagnâ l'instradâsi da lis unitâts pastorâls, in-fuartî il riferiment a la Peraule di Diu, cualificâ in maniere plui missionarie lis nestris comunitâts. Plui che no une descrizion astrate, al pues jessi util mostrâ cumò lis fasis di un percors comun, cun cualchi indicazion di calendari ch'è podarà jessi, se al covente, in part modificade cul timp a lâ.

**I obietîfs da la
visite pastorâl**

43. La visite pastorâl e scomence cuntun prin incuintri dal vescul cui conseis pastorâi da lis parochiis e da lis unitâts pastorâls (za esistentis o nassudis di pôc). E scomençarà tor la metât di otobar dal 2018 par concludisi in dicembar o, al plui tart, tal mê di zenâr dal 2019.

**L'inizi da la visite
pastorâl:
l'incuintri cui
conseis pastorâi**

L'incuintri al varà une finalitât dople:

- acompagnâ l'instradâsi da lis unitâts pastorâls cun cualchi indicazion concrete su la fonde di ce che al è presentât in cheste letare (cf nn. 29-41) e condividint lis primis sieltis
- verificâ la existence di Grups da la Peraule e ipotizantint di gnûfs cjapant note da la disponibilitât di pussibii animadôrs.

Par vecjos e gnûfs animadôrs, tai mê di zenâr-fe-

vrâr dal 2019 al è previodût un cors specific, di mût che tacant da la Cuaresime dal 2019 (e doprant un sussidi di pueste) al sarà pussibil inviâ in dute la Diocesi, in numar grant come che si spere, i Grups da la Peraule cun particolâr atenzion al teme dal discerniment (cf n. 8).

A la Peraule di Diu a saran dedicâts ancje i trê incuintris di inzornament pai components dai conseis pastorâi e la trê dîs di inzornament e formazion dal clericât.

44. Un secont moment da la visite pastorâl (a tacâ dai mêis di zenâr-fevrâr dal 2019) al sarà constituît dal incuintri dal vescul cun almancul un pôcs dai Grups da la Peraule che a operin za di un pieç in Diocesi e chei che man man si constituissaran, par tirâ dongje esperiencis, prudelâ percors, sostignî l'impegn a pro da la peraule di Diu.

**L'incuintri
cui Grups
da la Peraule**

45. Un tierç moment da la visite pastorâl al sarà un secont incuintri dal vescul cui conseis pastorâi parochiâi e di unitât pastorâl (dopo la Pasche dal 2019) e al varà lis finalitâts segnadis ca sot:

- fâ il pont sul percors (ancjemò iniziâl) da lis gnovis unitâts pastorâls
- pensâ une date par la presince dal vescul te unitât pastorâl (o tes parochiis) e viodi cun cualis modalitâts concretis metile in vore: timps, celebrations, realtâts di incuintrâ, e v.i. (v. sot n.48)
- individuâ lis personis disponibilis come "visitadôrs" (v. sot n. 46), cul invît a partecipâ al itinerari di formazion a pueste (al cole sul principi dal an pastorâl 2019-2020).

**Un secont incuintri
cui conseis
pastorâi**

46. Un quart moment, di meti in vore prime da la visite dal vescul (plui o mancul un pâr di mês prime da la date previodude e in ogni câs dal setembar dal 2019), al consist te visite, a non dal vescul, a lis fameis e a lis realtâts da la unitât pastorâl e da lis parochiis de bande dai "visitadôrs" (predis, diacuns, religjôs, catechiscj, animadôrs, e v.i.). Par cheste visite il sussidi di doprâ e difondi al è chel intitulât "*Si puedial?...*" (cf n. 10)
Une relazion curte di cheste ativitât e vignarà presentade al vescul prime da la visite.

La visite de bande dai "visitadôrs"

47. Intal stes timp – e al è un cuint element da la visite pastorâl – i uficis a pueste da la curie a incuintraran i predis, i conseis pastorâi e i altris operadôrs par une verifiches, cul jutori di schedis fatis a pueste, su cuatri temis: la iniziacion cristiane, la pastorâl familiâr, la prassi dai sacraments (cui adempiments relatîfs), la situacion patrimoniâl-finanziarie-aministrative.
Scomençant di chescj incuintris e vignarà compilate une relazion di consegnâ al vescul prime da la sô visite.

La verifiches di cuatri ambits

48. La presince dal vescul *in loco* e deventarà il sest moment da la visite pastorâl. La visite e previôt che il vescul si fermi li da la unitât pastorâl (o il grup di parochiis vicinis) dal miercus a la domenie (par lis realtâts plui grandis e sarâ pussibile une presince dopleade) cun chescj o simii impegnis e apontaments:
- partecipacion a la vite lavorative da lis comunitâts

La presince dal vescul

- visite a cualchi famee
- visite a cualchi malât
- incuintri cun conseis e operadôrs varis
- incuintri cui grups parochiâi e eclesiâi
- incuintri cui zovins (privilegjant par esempi chei cresemâts dal vescul in chescj agns)
- incuintri cui singui fedêi
- incuintri public
- visite ai lûcs di lavôr
- ...
- conclusion cuntune "domenie comunitarie".

49. La visite si concludarà par ogni singule unitât pastorâl o parochie cuntune letare dal vescul, ch'è varà dentri indicazioni e sugjeriments par la strade future, su la fonde da la visite. Daûr di cheste letare, al podarà jessi just che lis unitâts pastorâls a butedin jù un progjet pastorâl (o che lu controledin se lu àn za fat), sot forme di "ats da la comunitât" e lis parochiis no ancjemò in unitât pastorâl a metedin in zornade i "ats da la comunitât" metûts adun timp indaûr.

La letare dal vescul e i gnûfs "ats da la comunitât"

50. Al sarà di valutâ, massime intun confront tai diviers conseis diocesans, se a la fin da la visite pastorâl e sedi di previodi une assemblee di ecclesiastics par delineâ il percors diocesan dai agns a vignî.

Une assemblee di ecclesiastics?

ALORE LÔR A LERIN...

51. Il Vanzeli di Zuan, che di chel o vin scoltât il mandât dal Resurît, no si intarde tal descrivi cemût che chel mandât al sedi stât acolt e metût in vore dai dissepui. Al è plui preocupât di valorizâ la testimoniance dal Vanzeli stes e di cui che lu à scrit («*Chest al è il dissepul che al è testimoni di chestis robis e che lis à scritis, e nô o savìn che la sô testimoniance e je vere*»: 21, 24). Fin il Vanzeli di Mateu nol dîs dal dopo e si conclût cu lis peraulis dal Resurît, invezzi chel di Luche al rimande ai Ats la descrizion dal inizi da la mission scomençant da la Pentecostis e dal don dal Spirt. La conclusion, invezzi, dal Vanzeli di Marc e dîs cussì: «*Alore lôr a lerin a predicjâ dapardut, biel che il Signôr al operave insiemi cun lôr e al confermave la Peraule cui miracui che le compagnavin (Marc 16, 20).*»

E vûl jessi ancje la conclusion di cheste letare pastorâl. Parcè che al è timp di lâ, di proclamâ a ducj il *kerygma*, il cûr dal anunzi cristian, che pape Francesc al palese di gnûf cussì: «*Gesù Crist ti vûl ben, al à dât la sô vite par salvâti, e cumò al è vîf al to flanc ogni dì, par iluminâti, par rinfuarçâti, par liberâti*» (*Evangelii gaudium*, n. 164). Sì, Crist al è vîf, al è al gno, al to flanc, dongje a lis nestrîs comunitâts e nus acompagne ducj dilunc la nestre impegnative strade par meti in pratiche cumò il so mandât in ubidience a la sô Peraule.

**No une conclusion,
ma une partence**

Marie sorzint, ch'è à gjenerât il Salvadôr, che nus procuri la gracie e la gaudie da la mission parcè che il Crist al sedi gjenerât tal cûr di ogni om e femine che al da acet par gracie a la Peraule anunziade.

Santuari di Barbane (marine di Grau)
Ai 8 di setembar dal 2018